

# Addiu

Addiu i panni stesi ch'asciuvanu à lu sole  
Di statine chjamate à l'ora di mangjà  
E piccule vie strette, fresche è umbracciose  
È quelle chjachjarate  
Addiu paisolu, sì duru à cappià.

Addiu e rosule, addiu, fiori, addiu  
U biancu silenziu di a neve à lu cascà  
U prufumu di l'ortu dopu à l'annacquata  
Carezza di ventulellu  
M'avete fattu tantu è tantu sunnià.

Addiu e zitelle troppu prestu passate  
È tamante serate sane à cantà  
Ind'è le nostre feste tutte ste risate  
È pè l'impastizzata  
Amichi, a meia oghje, a vi lasciu pagà.

Addiu le parole, addiu li discorsi  
Chì sempre avemu fattu à nant'à lu campà  
È issi mondi rifatti colmi di sperenza  
Site stati battelli  
M'avete fattu crede à un'umanità.

Addiu le carezze, addiu li basgi  
Infiariate nuttate à vulè si mischià  
A l'attrachju, cummossu, è tristu à l'arrizzata  
S'ellu ci hè da capisce  
L'amore ùn vale chè per u so visticà.

Addiu li dulori, addiu le suffrenze  
M'avete mursicatu à fà mi briunà  
À fà mi sminticà la mio bella superba  
Ùn ne sò tantu fieru  
U mio male, addiu, m'arrendu, ùn ti ne fà.

Addiu à tè o mà, figliole è parenti  
Addiu, addiu à voi ch'erate sempre qui  
À quelli chì per quale u tempu m'hè mancatu  
Palesu a mio ghjelusia  
Di tutte isse bellezze ch'eo mi lasciu qui.